



*Kamis, 09 Maret 2023*  
**Ogen : Josua 6:20-27**



**Gegeh Musik**



**M**anusia enda la terpesirang ras musik. Musik banci maba kita ku bas pengejapen si mbages, e maka mekatemp nge arah musik si begi kita e ngobah perasan bage pe ayota (mimik wajah), kune musikna meriah erbahanca ukur ergiah-giah, bage pe sebalikna banci erbahanca naktak iluh.

Bas Kitab Josua enda sioge kerna gegeh musik e. Kuta Jeriko kuta si megegeh, tembok kuta e pajek megegeh segelah la banci iserang bangsa sideban. Tembok e jadi pertahanen. Tapi kai si jadi? Tembok si megegeh e banci kepe runtuh erkiteken sora terompet ras sora meganga. Benaken iembus imam-imam terompet e, terbegi man bangsa Israel, minter ia ersurak kerina alu sora megang. Sora terompet e ngasup mpersada kerina kalak Israel bas paksa e. La lit sipanjang punjuten, la lit si mekeng (bagi sieteh maka sedekah enda itandai kalak bangsa Israel e mekeng). Teridah maka musik e ngasup mpersadaken kita, sibegi kenca gendang minter ersada arih guna landek. Musik e mereken gegeh, kenca pitu wari erdalan, gegeh pe erurakna, tapi megis sora terompet e minter ersurak alu sora megang. Musik e erbahanca si kote jadi megegeh ras semangat. Bicara pinakit ndai minter madan, e maka lit nge terapi musik. Wari enda iperingeti wari musik nasional, siakui maka mbelin kel ngaruh musik e man banta, terlebih bas ibadahta. Adi la lit kenca musik minter bagi la erkesehen ibadah e. Adi tembok Jeriko pe banci runtuh, tentuna kerina tembok-tembok sierbahanca kita kote, sakit ras mbiar bas kegeluhen pe banci runtuh arah megiken musik simereken semangat.